

տանի եւ պետական, եւ հասարական, եւ անհատական կեանքի բոլոր արտայայտութիւնները եւ ըստ այնմ համապատասխան օրէնքներ սահմանել, համարեա ոչինչ չի ասում այն մասին, թէ ինչպիսի փոխարարութիւն պիտի ունենայ հայ ժողովուրդը իր հարեւանների եւ առհասարակ օտար պետութիւնների հետ: Չկայ եւ ոչ մի օրէնք առ այն, թէ Հայաստանը ո՞ւմ հետ եւ ի՞նչպիսի յարաբերութիւններ պիտի պահպանի — նամանակաւոր, խաղաղ ժամանակ: Նրա համար Հայաստանը, կարծէք, մի ռորինդոնեան կղզի է, կտրուած աշխարհի միւս պետութիւններից ու ժողովուրդներից եւ ինքն իր մէջ ամփոփուած:

Միակ օրէնքը, որ յիշեցնում է, թէ աշխարհիս երեսին, բացի Հայաստանից, կան նաեւ ուրիշ երկրներ ու պետութիւններ եւս, դա այն է, որ Հայաստան ապաստանած քրէական յանցաւորը — ինչ երկրից ու աղբից էլ լինի, պատերազմի թէ խաղաղ ժամանակ — չի յանձնուում իր պետութեանը, այլ մնալով Հայաստանում, վայելում է հայոց տան հովանաւորութիւնը (յիգ):

Բայց կան մի շարք օրէնքներ, որոնք վերաբերում են Հայաստանի միջազգային դիրքին, պատերազմի ժամանակ. աւելի ճիշդ՝ նրանք որոշում են, թէ Հայաստանը, պատերազմի ժամանակ, իր թշնամիների նկատմամբ, ի՞նչ կարող է անել եւ ինչ չանել: Այդ օրէնքներից մենք իմանում ենք, օրինակ, որ արգելւում է պատերազմում վերցրած գերիներին — քրիստոնեայ թէ հեթանոս — վաճառել. այլ նրանց պէտք է խնամքով պահել, որպէսզի պատերազմից յետոյ՝ կամ փոխանակենք մեր գերիների հետ — եթէ կան եւ կամ փրկանք ստանալով, ազատ արձակենք (յծե):

Նոյն կարգին պատկանող միւս օրէնքները հրամայում են մեզ. — եթէ որեւէ բերդ, քաղաք կամ աշխարհ զաշնադրութեամբ զբաւում ենք մենք, պէտք է հաւատարիմ մնանք դաշնադրութեան թելադրած բոլոր պայմաններին (յի): Կամ՝ պատերազմի ժամանակ անձնատուր եղած զինուորի ու զինուորականի կեանքը անպայմանօրէն պէտք է խնայենք (յծբ), եւայլն:

Քիչ են այդ կարգի օրէնքները, սակայն այդ քիչից էլ մենք յստակօրէն տեսնում ենք,

թէ ո՛րքան մարդասէր վերաբերմունք ունի մեր հեղինակը դէպի օտար ազգութիւնները, անգամ Հայաստանի թշնամի եւ նրա դէմ կրօնի մէջ դռնուող օտար ազգութիւնները:

ՕՐԷՆՔՆԵՐԻ ՈՐԻՆ, ՊԱՏԻՓՆԵՐԸ

ԵՒ ԱԶԴԵՑՈՒԹԻՒՆՆԵՐԸ

Պէտք է արձանագրել, որ Շահամիրեանի օրէնքների ողին ընդհանրապէս մեղմ է ու մարդասէր, մանաւանդ երբ ի նկատի ենք առնում, որ գրողը Պարսկաստանի դաժան օրէնքները ճաշակած մի ընտանիքի զաւակ է, այն էլ ժԸ. դարի Պարսկաստանի:

Անշուշտ, Եւրոպայի լուսաւոր ազգեցութեան շնորհիւ է, որ մարդը նրա աչքում արդէն մի որոշ արժէք է ներկայացնում, որի կեանքը թանգ է նրա համար: Եւ եթէ նա պատժում է մարդուն, պատժում է ոչ թէ վրէժխնդրութեան կրքից տարուած, այլ մարդասիրութիւնից դրդուած, մարդուն ազգելու մտադրութեամբ:

Դրա բազմաթիւ ապացոյցները մենք արդէն տեսել ենք մինչեւ այժմ. սակայն հետեւեալ երկու օրէնքները աւելի են շեշտում այդ:

1. Անշարժահա քրէական յանցաւորը — 19 տարեկանից փոքր — չի պատժուում, այլ միայն խրատուելով, ազատ է արձակուում (ւ՛):

2. Քրէական եւ այլ յանցանքների համար պատժուում է միմիայն յանցաւորը եւ ոչ թէ նրա ազգականները, ինչպէս այդ, մինչեւ վերջին ժամանակները, ընդունուած էր Պարսկաստանում (ւ՛ծդ, ւ՛ծե):

Շահամիրեանի պատիժները, բոլոր հնաբաւոր դէպքերում, հիմնուած են Աւետարանի այն պատուէրի վրայ, որ ասում է՝ ինչ որ կամենում ես, որ ուրիշները քեզ անեն, նոյնն էլ դու ուրիշներին արա. այսպէս՝ ծեծողը ծեծուում է իրենից ծեծուածից. եթէ անգամ ծեծողը քահանայ է, դատարնի առջեւ ծեծուողը նրան ծեծում է (նիք, նի). կամ՝ եթէ հարբածը վիրաւորում է մէկին, ինքն էլ հարբեցւում է եւ այդպէս պատժուում, իսկ եթէ սպանում է, հարբեցւում է եւ սպանում (նիա, նիք):

«Որոգայթ Փառաց»ի մէջ՝ սահմանուած պատիժները կարող ենք բաժանել 4 խմբի. —